



Èsi lubì?

DA MARIA CADRUVI

■ **A chaschun d'ina reportascha ch'jau aveva realisà per il radio suen-ter il Vivian m'aveva in um pli vegl en Val Medel ditg: «I n'è mai uschè grond donn che nagin n'ha gudogn.»** Cun au-ters plets: Insatgi profitescha adina. Sche nus essan sincers stuain nus conceder ch'i dat ina bella satisfacziun dad esser da la vart da quels e quellas che san co trair a niz e profitar. Quai ans dat il sentiment d'avair bain observà, bain cuminà, bain calculà e bain realisà.

In'inschignera tira a niz l'offerta d'in'otra firma, mida piazza e profitescha d'ina paja in detg toc pli auta. In amatour da cudeschs tira a niz ses temp per leger, sa diverta e profitescha spiertal-main ed emoziunalmain. Ina giugadura da tennis profitescha dad in mument da nunconcentraziun tar sia adversaria e gudogna il giu. In chasarin profitescha da las acziuns en butia e cumpra trais pacs café per il pretsch da dus. Tut che vul profitar. Atgnamain n'è quai ni illegal, ni infam, ni immoral.

E tuttina: Il pled «profitar» ha er in tif negativ. Jau patratg qua vi da profitaders che vegnan numnads per tudestg Abzo-

cker e Nutzniesser. Quels enconuschan sulettamain ina direcziun dal princip da dar e prender: Prender! Per fortuna è la gronda part da la glieud onesta ed undraivla. Igl è pia ina minoritad che profitescha sistematicamain sin donn e cust dals auters. Ma per tissientar l'atmosfera da la convivenza sin quest planet èsi tuttina memia blers – betg mo en l'economia ed en la politica. Els surpassan cun impertinenzia, e savens era cun intelligenza e raffinezza, ils cunfins dal profitar. Lur motivs pon esser differents. Lur agir è sumegliant: Els n'han simplamain naginas retegnientschas!

In proverbi rumantsch di: «La chaschun fa il paltrun.» Beads quels e quellas che na prendan betg la chaschun – malgrà ch'ella fiss qua ed il parsepen forsa plain, la chaschun da sa servir, guardond sulettamain per sasez e profitond sin donn e cust dad auters. Betg tut quai ch'è lubì puncto profit fa era senn, ubain ch'i fa senn sulettamain per l'agen ego, ma betg per il vischin, per l'ambient, per la cuminanza.

L'atura profitescha da la libertad ch'ella ha sco dunna pensiunada ed è mintgatant activa e creativa